



Broj/Број: 01/7, 02/3-50-1-17-2-20/06
Sarajevo/Сарајево: 26.7.2006.

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

| | | | |
|--------------------------|-----------------------|------------|--------------|
| PRIMLJENO: 26.01.2007.g. | | | |
| Organizaciona jedinica | Klasifikaciona oznaka | Redni broj | Broj priloga |
| | | | |

ZAPISNIK

20. zajedničke sjednice Komisije za finansijske i administrativne poslove Doma naroda i Administrativne komisije Predstavničkog doma Parlamentarne skupštine Bosne i Hercegovine, održane u Sarajevu dana 26.7.2006. godine, s početkom u 10,17 sati

PRISUTNI ČLANOVI KOMISIJE ZA FINANSIJSKE I ADMINISTRATIVNE POSLOVE DOMA NARODA: Ruža Stojanović, Mustafa Pamuk, Osman Brka i Velimir Jukić.

ODSUTNI ČLANOVI KOMISIJE ZA FINANSIJSKE I ADMINISTRATIVNE POSLOVE DOMA NARODA: Branko Zrno i Goran Milojević.

PRISUTNI ČLANOVI ADMINISTRATIVNE KOMISIJE PREDSTAVNIČKOG DOMA: Senija Kapetanović, Mubera Ušanović, Hazim Felić, Dušanka Majkić, Jozo Križanović, Momčilo Novaković, Vinko Zorić i Ruža Sopta.

ODSUTNI ČLANOVI ADMINISTRATIVNE KOMISIJE PREDSTAVNIČKOG DOMA: Mladen Potočnik.

OSTALI PRISUTNI: Sekretar Zajedničke službe Sekretarijata Parlamentarne skupštine Bosne i Hercegovine Aljoša Čampara, šef Računovodstva Parlamentarne skupštine Bosne i Hercegovine Jadranka Korać i ispred OSCE-a Amila Ibrahimović i Stiv Li.

Za sjednicu je predložen

DNEVNI RED

1. Usvajanje Zapisnika 19. zajedničke sjednice Komisija;
2. Razmatranje Projekcije budžeta Parlamentarne skupštine Bosne i Hercegovine za 2007. godinu;

3. Razmatranje Izvještaja o izvršenju budžeta Parlamentarne skupštine Bosne i Hercegovine za period od 1.1. do 30.6.2006. godine;
4. Razmatranje Izvještaja o reviziji Parlamentarne skupštine BiH za 2005. godinu;
5. Razmatranje Pravilnika o međunarodnim aktivnostima Parlamentarne skupštine Bosne i Hercegovine;
6. Razmatranje Prijedloga odluke o izmjenama i dopunama Pravilnika o plaćama i naknadama zaposlenih u Sekretarijatu Parlamentarne skupštine Bosne i Hercegovine (prečišćeni tekst), broj: 01/7,02/3-50-1-17-4-19/06, od 21.6.2006. godine;
7. Razmatranje Prijedloga Odluke o dopunama Pravilnika o načinu i uslovima korištenja internih i eksternih usluga-reprezentacije, PTT usluga, službenog vozila, službene odjeće, štampe i stručne literature u Parlamentarnoj skupštini Bosne i Hercegovine;
8. Tekuća pitanja:
 - a) Razmatranje Molbe za dodjelu novčane pomoći.

Dvadesetu zajedničku sjednicu Komisije za finasijske i administrativne poslove Doma naroda i Administrativne komisije Predstavničkog doma Parlamentarne skupštine Bosne i Hercegovine otvorila je Senija Kapetanović, predsjedavajuća Administrativne komisije Predstavničkog doma Parlamentarne skupštine Bosne i Hercegovine. Nakon što je konstatala da postoji kvorum, predložila je dnevni red i njegovu dopunu po kojoj bi se kao tačka AD-8 razmatrao Prijedlog za reguliranje statusa poslanika i delegata nakon isteka mandata, te pozvala prisutne da daju svoje primjedbe i sugestije. Ruža Sopta predložila je da se uvrsti nova tačka dnevnog reda – Prijedlog izmjena i dopuna Odluke o načinu obračuna plaća i ostalih materijalnih prava poslanika i delegata u Parlamentarnoj skupštini Bosne i Hercegovine (prečišćeni tekst), broj: 01/7, 02/3-50-1-17-3-19/06, od 21.6.2006., uz obrazloženje da nije pravedno da poslanici i delegati nakon isteka mandata idu na ulicu, odnosno primaju naknadu plaće samo šest mjeseci, a da državni službenici imaju pravo na otpremninu zavisno od godina radnog staža – i navela da preko 15 godina radnog staža državnim službeniku pripada otpremnina u visini 12 plaća, pa smatra da to pravo treba da imaju i članovi Parlamentarne skupštine Bosne i Hercegovine. Prijedlog Ruže Sopte podržao je Osman Brka i tražio da se donese druga odluka kojom će se reći da članovi Parlamentarne skupštine Bosne i Hercegovine nakon isteka mandata zadržavaju diplomatski pasoš naglasivši da ova odluka nije vezana ni za kakva dodatna materijalna sredstva pa iz tih razloga smatra da se može danas usvojiti. Na prijedlog Osmana Brke replicirala je Dušanka Majkić rekavši da su pitanja u vezi s diplomatskim pasošem riješena zakonom i nisu u nadležnosti ove komisije tako da ne vidi razlog za stavljanje ove tačke na dnevni red. Jozo Križanović predložio je da se s dnevnog reda skine tačka Ad-5 - Razmatranje Pravilnika o međunarodnim aktivnostima Parlamentarne skupštine Bosne i Hercegovine, s obzirom da on ne vidi poslovničku nadležnost Komisija za donošenje takvog akta. Izjasnio se da je on protiv uvrštavanja ove tačke dnevnog reda. Ruža Stojanović objasnila je da su mišljenje o Pravilniku dale obje komisije domova nadležne za vanjske poslove, da je formirana Potkomisija koja je bila dužna da sačini Prijedlog pravilnika i koja je radila na ovom aktu skoro godinu dana da bi ga u današnjem tekstu ponudila Komisijama na usvajanje, pa ne vidi ništa sporno da ova tačka ostane na dnevnom redu. Momčilo Novaković rekao je da on ne vidi ništa sporno u vezi s donošenjem ovog pravilnika koji je prošao sve propisane procedure, a osim toga on ne vidi ko bi ga u Parlamentarnoj skupštini Bosne i Hercegovine mogao donijeti s obzirom na materiju koju obuhvata, pa zato smatra da postoji nadležnost Komisija i da one treba da donesu Pravilnik. Upitao je Jozu Križanovića – da li on predlaže da Parlamentarna skupština Bosne i Hercegovine donese ovaj pravilnik. Jozo Križanović izjasnio se da je on za to da Komisije utvrde Pravilnik i upute ga domovima Parlamentarne skupštine Bosne i Hercegovine na usvajanje. Predsjedavajuća je dala na glasanje prijedlog Jozu Križanovića da se tačka Ad-5 skine s dnevnog reda današnje sjednice Komisija. Prisutni su o ovom prijedlogu glasali kako slijedi: 5 ZA i 5 PROTIV, tako da prijedlog nije prošao.

U vezi s prijedlogom Ruže Sopte zaključeno je da se on razmatra u okviru predložene tačke AD-8. Prisutni su jednoglasno usvojili predloženi dnevni red sa dopunom AD-8 - Razmatranje prijedloga za regulisanje statusa poslanika i delegata nakon isteka mandata, te pristupili njegovom razmatranju po utvrđenim tačkama.

AD-1 Zapisnik 19. zajedničke sjednice Komisije za finansijske i administrativne poslove Doma naroda i Administrativne komisije Predstavničkog doma Parlamentarne skupštine Bosne i Hercegovine usvojen je jednoglasno, bez primjedbi.

AD-2 Uvodno izlaganje o ovoj tački dnevnog reda dala je šef Računovodstva Jadranka Korać. Dodatno obrazloženje uz ovu tačku dnevnog reda dao je Aljoša Čampara koji je upoznao prisutne s planom rekonstrukcije Plave sale koji će ići u dvije faze, te planiranim radovima za opremanje svečanog ulaza i opravci tri lifta. Naglasio je da se planira kupovina dva putnička automobila čime se osigurava obnavljanje voznog parka Parlamentarne skupštine Bosne i Hercegovine, te istakao da ambasade stranih država više nisu zainteresirane da putem donacija finansiraju investicione radove što znači da će oni ići na teret Parlamentarne skupštine Bosne i Hercegovine. U vezi s donacijama, rekao je da je Kraljevina Norveška obećala donirati sredstva za popravku fasade zgrade. U skladu s prijedlogom dopune dnevnog reda koji je dala Ruža Sopta upoznao je prisutne da će se morati, ukoliko usvoje prijedlog da se naknada plaće isplaćuje 12 mjeseci, u Projekciji budžeta povećati naknada za plaće poslanicima i delegatima nakon isteka mandata u odnosu na planirani iznos za 100% jer je u Projekciji planirana isplata naknade za šest mjeseci.

Osman Brka upitao je ko je dao nalog da se radi Projekcija i zaključio da su je stručne službe Sekretarijata Parlamentarne skupštine Bosne i Hercegovine uradile same. Istakao je da nema primjedbi na Projekciju, ali smatra da joj mnogo toga treba dodati. Konstatirao je da će se Vijeće ministara BiH iduće godine preseliti u noboder, a po Projekciji povećana je administracija dok nisu predviđena sredstva za poboljšanje uslova rada članova Parlamentarne skupštine Bosne i Hercegovine. Smatra da treba poboljšati rad klubova i omogućiti im da imaju savjetnike. S obzirom da će u Parlamentarnoj skupštini Bosne i Hercegovine iduće godine biti više prostora, predložio je da se osigura u zgradi prostor u kojem će se moći sastajati poslanici kojima je prestao mandat, ali i da se planira otvaranje ambulante za hitne slučajeve.

Momčilo Novaković složio se s izlaganjem Osmana Brke ali je rekao da ostaje pitanje kako osigurati uslove za rad članova Parlamentarne skupštine Bosne i Hercegovine. Suština je da bi komisije trebalo da odrede ko će im i do kada pripremiti iznesene prijedloge, a posljedica njihove realizacije bit će iskazana kroz iznos potrebnih sredstava. Smatra da službe Sekretarijata Parlamentarne skupštine Bosne i Hercegovine treba pravilno da prezentiraju dešavanja u zgradi Parlamentarne skupštine Bosne i Hercegovine, odnosno stvoriti uslove da se javnost pravilno i istinito informira o svemu. U stavci III. PROGRAM POSEBNE NAMJENE-Klubovi poslanika i delegata predlaže se da se klubovima povećaju sredstva u odnosu na planirana od 30% do 50%.

Dušanka Majkić komentirala je priložene ulazne parametre koje je dostavio Informativno-dokumentacioni sektor i Sektor za informacione tehnologije, te predložila da se nelogične stavke i iznosi uz njih isprave.

Vinko Zorić komentirao je Tabelu br. 3 u kojoj ne vidi sredstva predviđena za pripremu prostora za rad klubova i naglasio da treći klub po veličini nema svojih prostorija. Smatra da, ako se ovo pitanje ne može riješiti u Parlamentarnoj skupštini Bosne i Hercegovine, onda treba unajmiti prostor za rad klubova. Misli da sredstva koja dobiva klub ne zadovoljavaju potrebe i ne bi mogla pokriti troškove radnika koje bi angažirao klub, pa zato predlaže povećanje sredstava na stavci-Klubovi poslanika i delegata.

Ruža Sopta naglasila je da se povećala stavka za odvojeni život, a smatra da nema potrebe da se planiraju sredstva za te namjene s obzirom da poslanici i delegati u Parlamentarnoj skupštini Bosne i Hercegovine nemaju ni svoj stol, pa ne postoji ni potreba da koriste odvojeni život. Mišljenja je da rad parlamentaraca osakaćuju sekretari komisija koji vode po tri i više komisija što je, po njenom mišljenju, neprimjereno. Na taj način gubi se na kvalitetu a zadovoljava se samo forma. Istakla je da ona ne može kvalitetno raditi ako je član tri komisije, pa zato predlaže da svaka komisija ima svoj sekretarijat jer smatra da je to prioritet za rješavanje.

Jadranka Korać rekla je da bi voljela da su klubovi prije izrade Projekcije budžeta dostavili ulazne parametre na osnovu kojih bi bila planirana sredstva, pa većina primjedbi ne bi bila iznesena na današnjoj sjednici.

Senija Kapetanović pitala je Jadranku Korać – da li je poslala dopis klubovima da daju ulazne parametre za Projekciju budžeta.

Aljoša Čampara konstatirao je da je problem prostora za rad klubova evidentan, ali je trenutno nerješiv s obzirom da nema dovoljno prostora. U vezi sa sekretarijatom komisija, naglasio je da je to pitanje riješeno i da je planirano da svaki sekretar komisije ima prateću službu. Pozvao je prisutne da kažu koje stavke treba dodati u Projekciju i za koliko povećati sredstva na pojedinim stavkama u budžetu.

Mustafa Pamuk naglasio je problem pretrpanosti zgrade Parlamentarne skupštine Bosne i Hercegovine i nemogućnost rješavanja pitanja prostora za rad klubova naglasivši da je to pitanje u nadležnosti kolegija Parlamentarne skupštine Bosne i Hercegovine, a da se ovdje govori o Projekciji budžeta Parlamentarne skupštine Bosne i Hercegovine i misli da je predložena Projekcija, uz manje korekcije, dobra.

Osman Brka zatražio je da se unese u zapisnik da misli da nije u redu da se kroz Projekciju budžeta poboljšaju uslovi rada za 51 zaposlenog koji će se primiti, a ne planirati sredstva za poboljšanje rada članova Parlamentarne skupštine Bosne i Hercegovine.

Replicirao je Vinko Zorić i rekao da on ne bi rekao kao Osman Brka jer povećanje broja zaposlenih za 51 upravo znači poboljšanje uslova rada članova Parlamentarne skupštine Bosne i Hercegovine, ali i dalje smatra da i klubovima treba osigurati stručnog čovjeka i prostor za rad.

Aljoša Čampara odgovorio je da Klub SDP-a ima svog čovjeka koji se finansira iz sredstava Kluba.

Jozo Križanović rekao je da je problem stvaranje uslova za rad klubova, ali smatra da se i to pitanje uz malo napora može riješiti. Mišljenja je da određene probleme stvara i iznos sredstava koji je odobren za potrebe klubova, pa zato predlaže da se sagleda mogućnost povećanja sredstava na ovoj stavci u Projekciji budžeta. U vezi sa zaposlenim u klubovima, naglasio je da je to samo pitanje organizacije unutar kluba.

Ruža Stojanović predložila je da se donese zaključak kojim bi se predvidjela sredstva za kupovinu laptopa za potrebe članova Parlamentarne skupštine Bosne i Hercegovine, kao i sredstva za naknadu troškova mobilnog telefona složivši se s mišljenjem da na poziciji - Klubovi poslanika i delegata treba povećati sredstva.

Velimir Jukić rekao je da se za interventne stvari, kao što su popravak krova zgrade, ne treba čekati već treba odmah intervenirati i otkloniti kvar. Smatra da je nedopustivo da članovi Parlamentarne skupštine Bosne i Hercegovine nemaju laptope, posebno što su veliki troškovi na faksanju materijala koji bi se mogao dostaviti e-mailom. Misli da sredstva za rad klubova treba povećati od 30% do 50%.

Senija Kapetanović replicirala je Velimiru Jukiću istaknuvši da su pokrenuta ozbiljna pitanja a da se trenutno ne može riješiti curenje krova na zgradi Parlamentarne skupštine Bosne i Hercegovine s obzirom da za to nisu predviđena sredstva u budžetu.

Dušanka Majkić zatražila je da predsjedavajuća stavi na glasanje prijedlog da se povećaju sredstva za rad klubova za 50% u odnosu na planirani iznos.

Vinko Zorić predložio je da se u vezi s Projekcijom budžeta zakaže nova sjednica na kojoj bi se razmotrila sva otvorena pitanja.

Momčilo Novaković rekao je da bi on ipak dao povjerenje zaposlenim u Zajedničkoj službi Sekretarijata Parlamentarne skupštine Bosne i Hercegovine da unesu izmjene i dostave Projekciju budžeta Ministarstvu finansija i trezora BiH, posebno što zaposleni idu na godišnje odmore 31.7.2006. godine.

Vinko Zorić smatra da bi bilo dobro da se u Projekciji budžeta predvide sredstva za održavanje prostora.

Momčilo Novaković predložio je da se u vezi s investicionim održavanjem uputi dopis Službi za zajedničke poslove institucija Bosne i Hercegovine.

Vinko Zorić ponovo je zatražio da se predvidi osiguranje prostora za rad klubova.

Aljoša Čampara naglasio je da on garantira da će u idućem sazivu svi klubovi imati svoj prostor.

Predsjedavajuća sjednicom dala je na glasanje prijedlog da se povećaju sredstva za rad klubova, kao i Prijedlog projekcije budžeta. Prisutni su sa 10 glasova ZA usvojili

ODLUKU

I.

Usvaja se predložena Projekcija budžeta za 2007. godinu uz sljedeće izmjene:

- a) stavka III. PROGRAMI POSEBNE NAMJENE – Klubovi poslanika i delegata naroda - povećava se za 50% u odnosu na planirani iznos u Prijedlogu projekcije budžeta za 2007. godinu;
- b) stavka I. TEKUĆI IZDACI – Plaće zaposlenih - u vezi s ovom stavkom treba imati u vidu da je za narednu zajedničku sjednicu Komisija predviđeno razmatranje prijedloga da poslanici i delegati, nakon prestanka mandata, imaju pravo na naknadu plaće 12 mjeseci od dana prestanka mandata, a koji nije prihvaćen na 20. zajedničkoj sjednici s tim da je donesen zaključak da se ovaj prijedlog pripremi za narednu sjednicu nakon što ga usaglase predlagač i Sekretarijat Predsjedništva BiH.

II.

Sekretar Zajedničke službe Sekretarijata Parlamentarne skupštine Bosne i Hercegovine obratit će se pismeno Službi za zajedničke poslove institucija Bosne i Hercegovine sa zahtjevom da planiraju neophodna sredstva za popravku krova zgrade Parlamentarne skupštine Bosne i Hercegovine u Projekciji budžeta za 2007. godinu.

III.

Za realizaciju ove odluke zadužuju se Kolegij Sekretarijata i Računovodstvo Parlamentarne skupštine Bosne i Hercegovine.

IV.

Odluka stupa na snagu danom donošenja.

AD-3. Uvodno izlaganje o ovoj tački dnevnog reda dao je Aljoša Čampara.

Prisutni su jednoglasno usvojili

ZAKLJUČAK

Prima se k znanju Izvještaj o izvršenju Budžeta za period od 1.1. do 30.6.2006. godine.

AD-4. Uvodno izlaganje o ovoj tački dnevnog reda dao je Aljoša Čampara, koji je, između ostalog, naglasio da je ovo prvi put da je Parlamentarna skupština Bosne i Hercegovine dobila pozitivno mišljenje.

Prisutni su jednoglasno usvojili

ZAKLJUČAK

Usvaja se Izvještaj Ureda za reviziju poslovanja institucija BiH o reviziji Parlamentarne skupštine Bosne i Hercegovine za 2005. godinu.

AD-5 Uvodno izlaganje o ovoj tački dnevnog reda dala je Senija Kapetanović. Dodatno obrazloženje uz ovu tačku dnevnog reda dao je Hazim Felić istaknuvši da ga je traženje Joze Križanovića da se ova tačka skine s dnevnog reda podstaklo da razmišlja da bi možda trebalo procijeniti da se ovaj akt dostavi drugim komisijama da daju svoje mišljenje. Skrenuo je ujedno pažnju prisutnim da treba da se izjasneo iznosima kad se radi o poklonima kako bi se oni ugradili u član 40. Pravilnika.

Senija Kapetanović naglasila je da se Pravilnikom utvrđuju pravila ponašanja prilikom posjeta, a ne govori se o pravima i dužnostima članova Parlamentarne skupštine Bosne i Hercegovine.

Vinko Zorić konstatirao je da su na sjednici prisutna dva člana Kolegija Doma naroda Parlamentarne skupštine Bosne i Hercegovine koji bi se mogli izjasniti o Pravilniku.

Velimir Jukić rekao je da u Poglavlju III. član 14. ne regulira dobro obaveze Ministarstva vanjskih poslova BiH. Naglašava da je važna uloga DKP mreže, pa smatra da treba razgovarati o ovom pitanju i predložiti poboljšanja teksta. Podržava ideju da Pravilnik ide na usvajanje na domove Parlamentarne skupštine Bosne i Hercegovine.

Senija Kapetanović istakla je da se o Pravilniku može raspravljati s tim da ne smatra da ima dovoljno vremena da ovaj akt ide u parlamentarnu proceduru.

Ruža Stojanović informirala je prisutne da je Potkomisija pet puta slala dopis da se daju primjedbe na ovaj akt, kao i to da je i Kolegiju poslan zaključak da razmotri ovaj akt i da svoje primjedbe. Naglasila je da se ovaj akt može mijenjati, pa predlaže da se on usvoji a da se u toku primjene mogu otkloniti nedostaci kroz njegove izmjene i dopune.

Hazim Felić predložio je da se u član 40. Pravilnika ugrade iznosi i to: pod a) 500,00 KM, pod b) 350,00 KM i c) 100,00 KM.

Senija Kapetanović predložila je da se usvoji Pravilnik i pošalje domovima na potvrđivanje.

Momčilo Novaković ukazao je na odredbu člana 66. Pravilnika i predložio da se ona izmijeni tako da glasi:

"Član 66.

Ovaj pravilnik stupa na snagu danom kada ga potvrde domovi Parlamentarne skupštine."

Prisutni su jednoglasno usvojili Pravilnik o međunarodnim aktivnostima Parlamentarne skupštine Bosne i Hercegovine s tim da se u član 40. ugrade iznosi i to: pod a) 500,00 KM, pod b) 350,00 KM i c) 100,00 KM, te izmijenjena odredba člana 66.

Prisutni su jednoglasno donijeli

ZAKLJUČAK

Administrativna komisija Predstavničkog doma i Komisija za finansijske i administrativne poslove Doma naroda Parlamentarne skupštine Bosne i Hercegovine zaključile su da se Pravilnik o međunarodnim aktivnostima Parlamentarne skupštine Bosne i Hercegovine, usvojen na njihovoj 20. zajedničkoj sjednici, održanoj 26.7.2006. godine, uputi domovima Parlamentarne skupštine Bosne i Hercegovine na potvrđivanje.

Pravilnik o međunarodnim aktivnostima Parlamentarne skupštine Bosne i Hercegovine stupit će na snagu kad ga potvrde domovi Parlamentarne skupštine Bosne i Hercegovine.

AD-6 Uvodno izlaganje uz ovu tačku dao je Aljoša Čampara.

Vinko Zorić rekao je da nije u redu da se ova tačka razmatra prije tačke koju je delegirala Ruža Sopta, odnosno prije odlučivanja o pravima članova Parlamentarne skupštine Bosne i Hercegovine.

Ruža Stojanović naglasila je da se na prošloj sjednici usaglasio ovakav Prijedlog odluke o izmjenama i dopunama Pravilnika o plaćama i naknadama zaposlenih u Sekretarijatu Parlamentarne skupštine Bosne i Hercegovine (prečišćeni tekst), broj: 01/7,02/3-50-1-17-4-19/06, od 21.6.2006. godine. Upitala je prisutne da li predlažu iznos do 400,00 KM kada se radi o zakupu stana članova Kolegija Sekretarijata Parlamentarne skupštine Bosne i Hercegovine.

Dušanka Majkić rekla je da je na prošloj sjednici utvrđeno da iznos za zakup stana bude do 500,00 KM i da ona danas ne vidi nijedan argument koji bi bio suprotan datom prijedlogu.

Jozo Križanović zatražio je da se zapisnički konstatira da je napustio prošlu sjednicu iz opravdanih razloga, a zatim upitao – ko ima pravo izjednačavati prava državnih službenika i članova Parlamentarne skupštine Bosne i Hercegovine, posebno što on smatra da nije korektno davati isti status članu Parlamentarne skupštine Bosne i Hercegovine i državnom službeniku.

Vinko Zorić rekao je da bi on napravio razliku između njih pa makar to bilo 450,00 KM za državne službenike.

Osman Brka naglasio je da je bespredmetno raspravljati i da on nije za ovaj prijedlog odluke.

Ruža Sopta predložila je da se Prijedlog odluke odnosi samo na članove Kolegija Sekretarijata Parlamentarne skupštine Bosne i Hercegovine.

Nakon rasprave, sekretar Komisija Davorka Čaplinski reagirala je na ispravku i upozorila prisutne da, prije nego što glasaju, treba u Prijedlogu odluke o izmjenama i dopunama Pravilnika o plaćama i naknadama zaposlenih u Sekretarijatu Parlamentarne skupštine Bosne i Hercegovine (prečišćeni tekst), broj: 01/7,02/3-50-1-17-4-19/06, od 21.6.2006. godine, član 1. promijeniti da glasi:

"Član 1.

U članu 12. Pravilnika o plaćama i naknadama zaposlenih u Sekretarijatu Parlamentarne skupštine Bosne i Hercegovine (prečišćeni tekst), broj: 01/7,02/3-50-1-17-4-19/06, od 21.6.2006. godine, iza stava (3) dodaje se novi stav (4) koji glasi:

"(4) Izuzetno od odredbi stava (3) ovog člana, članovi Kolegija Sekretarijata imaju pravo na naknadu u visini do 400,00 KM za troškove smještaja (zakupa stana)."

Dosadašnji stav (4) postaje stav (5).

Zatim je predsjedavajuća dala na glasanje Prijedlog odluke uz navedenu izmjenu člana 1. Prisutni su sa 8 glasova ZA i 2 glasa PROTIV usvojili

ODLUKU

o izmjenama i dopunama Pravilnika o plaćama i naknadama zaposlenih u Sekretarijatu Parlamentarne skupštine Bosne i Hercegovine (prečišćeni tekst), broj: 01/7,02/3-50-1-17-4-19/06, od 21.6.2006. godine

Član 1.

U članu 12. Pravilnika o plaćama i naknadama zaposlenih u Sekretarijatu Parlamentarne skupštine Bosne i Hercegovine (prečišćeni tekst), broj: 01/7,02/3-50-1-17-4-19/06, od 21.6.2006. godine, iza stava (3) dodaje se novi stav (4) koji glasi:

"(4) Izuzetno od odredbi stava (3) ovog člana, članovi Kolegija Sekretarijata imaju pravo na naknadu u visini do 400,00 KM za troškove smještaja (zakupa stana)."

Dosadašnji stav (4) postaje stav (5).

Član 2.

Odluka stupa na snagu danom donošenja.

AD-7 U vezi s ovom tačkom dnevnog reda, Ruža Stojanović rekla je da u Prijedlogu odluke u članu 34.a) treba promijeniti riječ "stalnog" u "izuzetno".

Momčilo Novaković rekao je da u članu 34.a) treba reći da članovi Kolegija Sekretarijata imaju pravo na korištenje službenog vozila.

Replicirala je Ruža Sopta i rekla da bi ova odredba bila prejaka.

Aljoša Čampara pojasnio je prijedlog naglasivši da je izmjena akta potrebna kako bi se omogućilo da vozilo ode po Branku Todorović, sekretara Predstavničkog doma Parlamentarne skupštine Bosne i Hercegovine, kada zbog potreba posla mora doći u 6,30 sati jer u to vrijeme nema redovnog prijevoza od mjesta njenog stanovanja do Parlamentarne skupštine Bosne i Hercegovine.

Vinko Zorić predložio je da se prihvati Prijedlog odluke o dopunama Pravilnika o načinu i uslovima korištenja internih i eksternih usluga-reprezentacije, PTT usluga, službenog vozila, službene odjeće, štampe i stručne literature u Parlamentarnoj skupštini Bosne i Hercegovine, jer on tu ne vidi ništa sporno.

Osman Brka rekao je da on nije za to da se po svaku cijenu državni službenici stavljaju ispred članova Parlamentarne skupštine Bosne i Hercegovine.

Replicirao je Aljoša Čampara i rekao da članovi Parlamentarne skupštine Bosne i Hercegovine ne moraju biti svaki dan na poslu, a što nije slučaj s državnim službenicima.

Odgovorio mu je Osman Brka rekavši da to znači da sekretar Predstavničkog doma Parlamentarne skupštine Bosne i Hercegovine, ima pravo na upotrebu službenog vozila svaki dan.

Vinko Zorić konstatirao je da Parlamentarna skupština Bosne i Hercegovine mora imati dobre sekretare.

Odgovorio mu je Osman Brka da oni ipak ne mogu biti ispred članova Parlamentarne skupštine Bosne i Hercegovine.

Nakon rasprave, predsjedavajuća je dala na glasanje Prijedlog odluke o dopunama Pravilnika o načinu i uslovima korištenja internih i eksternih usluga-reprezentacije, PTT usluga, službenog vozila, službene odjeće, štampe i stručne literature u Parlamentarnoj skupštini Bosne i Hercegovine.

Za Prijedlog odluke glasalo se po domovima.

Prisutni članovi Administrativne komisije Predstavničkog doma Parlamentarne skupštine Bosne i Hercegovine glasali su: 4 ZA, 3 PROTIV i 1 SUZDRŽAN.

Prisutni članovi Komisije za finansijske i administrativne poslove Doma naroda Parlamentarne skupštine Bosne i Hercegovine glasali su: 1 ZA, 2 PROTIV i 1 SUZDRŽAN, tako da Prijedlog odluke nije prihvaćen na ovoj Komisiji.

Nakon glasanja Momčilo Novaković predložio je da se odmah ide na usaglašavanje sa stavom Komisije za finansijske i administrativne poslove Doma naroda Parlamentarne skupštine Bosne i Hercegovine po kojem se iz člana 34.a) briše riječ "stalnog".

Prisutni članovi Administrativne komisije Predstavničkog doma Parlamentarne skupštine Bosne i Hercegovine jednoglasno su prihvatili ovaj prijedlog.

Nakon toga konstatirano je da su prisutni donijeli

ODLUKU

o dopunama Pravilnika o načinu i uslovima korištenja internih i eksternih usluga – reprezentacije, PTT usluga, službenog vozila, službene odjeće, štampe i stručne literature u Parlamentarnoj skupštini Bosne i Hercegovine

Član 1.

U Pravilniku o načinu i uslovima korištenja internih i eksternih usluga – reprezentacije, PTT usluga, službenog vozila, službene odjeće, štampe i stručne literature u Parlamentarnoj skupštini Bosne i Hercegovine, broj: 01/7,02-/03-50-1-188-6-9/05, od 25.5.2006. godine, iza člana 34. dodaje se član 34 a) koji glasi:

" Član 34.a)

Članovi Kolegija Sekretarijata za vršenje dužnosti u Parlamentarnoj skupštini imaju pravo korištenja službenog vozila".

Član 2.

Odluka stupa na snagu danom donošenja.

AD-8 Uvodno izlaganje o ovoj tački dnevnog reda dao je Aljoša Čampara.

Jozo Križanović rekao je da je nepotrebno da se članovi Parlamentarne skupštine Bosne i Hercegovine pojedinačno obraćaju službi ali da smatra da je za to još rano jer ima dovoljno vremena nakon saznanja o rezultatima izbora. Smatra da je 30 dana nakon obavljenih izbora dovoljno da se pitanja u vezi s naknadom plaće nakon prestanka mandata riješe.

Momčilo Novaković podsjetio je prisutne da se radi o pojedinačnim pravima članova Parlamentarne skupštine Bosne i Hercegovine i da zato smatra da se svaki član treba obratiti pojedinačno nadležnoj službi u vezi s ostvarivanjem ovog prava.

Aljoša Čampara rekao je da je ovo pitanje regulirano aktima Parlamentarne skupštine Bosne i Hercegovine.

O ovoj tački dnevnog reda prisutni nisu dalje diskutirali.

AD-9 a) Prijedlog izmjena i dopuna Odluke o načinu obračuna plaća i ostalih materijalnih prava poslanika i delegata u Parlamentarnoj skupštini Bosne i Hercegovine (prečišćeni tekst), broj: 01/7, 02/3-50-1-17-3-19/06, od 21.6.2006.;

Uvodno izlaganje o ovoj tački dnevnog reda dala je Ruža Sopta i pročitala prisutnima prijedlog izmjene tačke XXV. Odluke o načinu obračuna plaća i ostalih materijalnih prava poslanika i delegata u Parlamentarnoj skupštini Bosne i Hercegovine (prečišćeni tekst), broj: 01/7, 02/3-50-1-17-3-19/06, od 21.6.2006. godine, koji glasi:

"Tačka XXV. mijenja se i glasi:

Poslanici i delegati koji ostvaruju prava iz radnog odnosa u Parlamentarnoj skupštini Bosne i Hercegovine imaju pravo na naknadu plaće 12 mjeseci od dana konstituiranja sljedećeg saziva Predstavničkog odnosno Doma naroda Parlamentarne skupštine Bosne i Hercegovine.

Pravo iz stava (1) ovog člana poslaniku i delegatu prestaje danom zasnivanja radnog odnosa."

Prijedlog izmjene tačke XXV. Odluke obrazložila je činjenicom da je Zakonom o državnoj službi u institucijama Bosne i Hercegovine ("Sl. glasnik BiH", br.: 19/02, 35/03, 4/04, 17/04, 26/04, 37/04, 48/05 i 2/06) predviđeno da državni službenik zavisno od godina radnog staža ima pravo na otpremninu u visini šest, odnosno 12 plaća kad mu prestaje radni odnos tako da smatra da su članovi Parlamentarne skupštine Bosne i Hercegovine u nepovoljnijem položaju u odnosu na državne službenike. Mišljenja je da prava treba izjednačiti.

Davorica Čaplinski upozнала je prisutne šta u pravu znači pravo na otpremninu u slučaju prekobrojnosti državnog službenika, a šta pravo na naknadu plaće, posebno s aspekta radnog staža koji teče za taj period, doprinosa za penzijsko-invalidsko osiguranje i zdravstveno osiguranje što znači da se ova dva prava ne mogu komparirati.

Velimir Jukić rekao je da, kad se radi o ova dva prava, u slučaju otpremnine državni službenik nema reguliran radni staž za navedeni period.

Momčilo Novaković naglasio je da naknada plaće članovima Parlamentarne skupštine Bosne i Hercegovine nije otpremnina već plaća, pa on prihvata da pravo na naknadu plaće pomjeri sa šest mjeseci na 12 mjeseci.

Jozo Križanović istakao je da se odluka na 12 mjeseci zatekla u Parlamentarnoj skupštini Bosne i Hercegovine i da su ove Komisije vratile na šest mjeseci kako bi se izjednačili s primanjima članova Predsjedništva BiH, pa ne vidi svrhu da se na kraju mandata ponovo vrši izmjena i uvodi pravo na naknadu plaće u trajanju od 12 mjeseci. Podsjetio je prisutne da je Predstavnički dom Parlamentarne skupštine Bosne i Hercegovine usvojio Rezoluciju o moratoriju svih privilegija i povećanja plaća pa je iz principijelnih razloga protiv prijedloga Ruže Sopte.

Aljoša Čampara sugerirao je, s obzirom na loša iskustva iz prošlog mandata, da se ovo pitanje danas regulira.

Momčilo Novaković konstatirao je da je tačno što je rekao Jozo Križanović, ali i to da su članovi Parlamentarne skupštine Bosne i Hercegovine iz prošlog saziva ovo pravo koristili po starom. Misli da nema smisla da ovo pravo bude veće od prava članova Predsjedništva Bosne i Hercegovine, odnosno da članovi Parlamentarne skupštine Bosne i Hercegovine ostvaruju pravo na naknadu plaće u trajanju od 12 mjeseci, a članovi Predsjedništva Bosne i Hercegovine šest mjeseci, pa će iz navedenih razloga glasati protiv.

Prijedlog Ruže Sopte dat je na glasanje.

Za Prijedlog Ruže Sopte glasalo se po domovima.

Prisutni članovi Administrativne komisije Predstavničkog doma Parlamentarne skupštine Bosne i Hercegovine glasali su: 2 ZA, 3 PROTIV i 2 SUZDRŽAN tako da Prijedlog Ruže Sopte nije prihvaćen na ovoj Komisiji.

Prisutni članovi Komisije za finansijske i administrativne poslove Doma naroda Parlamentarne skupštine Bosne i Hercegovine glasali su: 4 ZA tako da je Prijedlog Ruže Sopte prihvaćen na ovoj Komisiji.


Nakon glasanja, predsjedavajuća sjednicom pitala je članove Administrativne komisije Predstavničkog doma Parlamentarne skupštine Bosne i Hercegovine koji su bili protiv i suzdržani da li se mogu usaglasiti s Komisijom za finansijske i administrativne poslove Doma naroda Parlamentarne skupštine Bosne i Hercegovine. Usaglašavanje nije prihvaćeno.

Nakon toga Momčilo Novaković predložio je Ruži Sopti da svoj prijedlog usaglasi sa Sekretarijatom Predsjedništva Bosne i Hercegovine i da ga pripremi za narednu zajedničku sjednicu Komisija.


b) Razmatranje Molbe za dodjelu novčane pomoći

U vezi s ovom tačkom dnevnog reda, konstatirano je da nema pravnog osnova za njeno razmatranje.

Nakon što je iscrpljen dnevni red, u 12,45 sati završena je 20. zajednička sjednica Komisije za finansijske i administrativne poslove Doma naroda i Administrativne komisije Predstavničkog doma Parlamentarne skupštine Bosne i Hercegovine.


 Sekretar
 Administrativne komisije
 Predstavničkog doma
 Davorka Čaplinski

Predsjedavajuća
 Komisije za finansijske i administrativne poslove
 Doma naroda
 Ruža Stojanović



Predsjedavajuća
 Administrativne komisije
 Predstavničkog doma
 Senija Kapetanović

